

BRIEF AUS DER PROVINZ

Männer, schaut auf Schloßberg!

Liebe Kulturredaktion,

de ganze Wäid schaut zur Zeit auf Kopenhagen, wo's um unsa Wäidklima geht und wart auf de noudwendige wirtschaftlich-technisch-ökologische Revolution, damit mia aa in hundad Jahr no aufm Sudelfäid Schifahrn kinnan. Aba, i glaab, bevor de Klimaerwärmung aufgehoidn werd, erfindn s' ja eha no an Kunstschnäa, der easchd bei zwanzg Grod schmätzt.

Weniga ham letzte Woch auf Tuntenthausen gschaut, do is da Huaba Marcel, Tierarzt, Schuischdaadssekretär und vahindada Landwirtschaftsminista, zum neia Vorsitzendn vom Männerverein Tuntenthausen gwäiht worn. Sei Wahlergebnis war bessa wia des vom Vorsitzenden Säähofa bei da CSU. Der hod letzts Jahr 90,3 Prozent kriagt. Da Huaba Marcel, der bloß deszweng ned Landwirtschaftsminista worn is, weil a aa boor Kilometa zweit im Süden, oiso grod ums Orschlecka in Oberbayern wohnt und ned in Niedabayern, hod bei da Woih genau hundad Prozent kriagt. Bloß in Afrika hod scho amoi a Präsident üba hundad Prozent dabackt. Dort san de Schwarz'n hoid no schwärza. Aba bei de hundad Prozent vom Marcel muaß da Horstl ois Ministapräsident aufbassn. Mit de katholischn Männer is ned zum Schbassn! De Ministapräsidentn wechseln in Bayern schnella ois wia de Vorsitzendn vom Männerverein.

Gor neamd aba hod de Woch auf Schloßberg gschaut. Do is wirkle wos Revolutionäres bassiert. Des is, ois wenn de Amis in Kopenhagn song daan, sie schoitn im Summa de Klimaanlagn oa Grod höha oda de Angela setzat durch, dass ma in Deitschland bloß no hundad fuchzge fahrn derfad. Ja, in Schloßberg bei Rousnam hod's a „revolutionäre Satzungsänderung“ gem, is bei Eich in da Zeidung gschdandn. Da Männergesangverein hod beschlossn, dass a iatz aa weibliche Mitglieder aufnimmt. Aba ma derf nadürle aa bei na Revolution ned zweit geh. De Damen derfan bloß passive Mitglieder sei. Die derfan oiso Kuacha bacha, Kafää kocha, sogor dirigieren, aba ned singa. Guad, sunst waar's a koa Männergesangverein mehr.

Aba Männer basst's auf! Aa gefährliche Anfang is gmacht. Da Bundeskanzler is a Frau, da obaste Bischof vo de Evangelischen is a Frau, vor tausend Jahr is angeblich sogor a Frau Papst gwen, so kon ma's jedenfois zur Zeit im Kino sehng. Iatz is de Wäid in Tuntenthausen no in Ordnung; aba nochedem, wos in Schloßberg bassiert is, kon ma ned garantiern, dass in zehn Jahr da Huaba Marcel no Vorsitzenda is. Do mog a dann vielleicht Ministapräsident sei, aba da Vorsitzende hoaßt Danie-la Raab.

Des befürcht

**Euer Kultureleser
Vinzenz Summerer**